

11

AU LOMANA NA NOQU MATAVUVALE

IVAKAMACALA TAUMADA VEI QASENIVULI

Ni ko vakarautaki iko vakayalo mo vakatavulica na lesoni oqo, yalovinaka wilika ka vakasamataka na veika oqo: Na matavuvale sa iusutu ni yavu ni veivakabulai. E sa tauyavutaka kina na Tamada Vakalomalagi na vei-matavuvale me kauta mai vei keda na bula marau ka vakarautaki keda ki na bula tawamudu. Ena loma ni matavuvale eda na vulica rawa kina na ivakavuvuli dodonu ena dua na yalo ni veilomani. Sa qai ka bibi dina kivei ira na lewe ni matavuvale me ra veilomani ka veikauwaitaki vakai ira. Eda dau vakaraitaka na noda loloma ena noda veivuke ka veidokadokai (raica na Efeso 6:1–3). Sa vakatavulica vei keda na ivolanikalou mo “dou veilomani vakai kemudou [ka] dou loma vinaka” (Efeso 4:32; raica talega “Na Matavuvale: Ai Vakaro ki Vuravura Raraba,” *Ensign*, Nov. 1995, 102).

VAKAVAKARAU

Vakatotomuria ena pepa se lavetaka e dua na ilavelave ni iyaloalo ni matavuvale ena tabana e 51. Me ra qai rokataki, ke gadrevi. Kotiva laivi ka biuta ki na dua na ka vakalomana (container).

VULI MAI NA ITAVIQARAVI

Tekivu ena dua na itaviqaravi ni veivakasogoni. Me baleta na kena vakasama, raica na tabana e 3.

Masu Sureta e dua na gone me cabora na idola masu.

iYaloyalo Vakaraitaka na kedratou iyaloalo na matavuvale mamarau e tiko ena tabana e 50. Vakamacalataka kivei ira na gone ni sa solia na Tamada Vakalomalagi kivei keda e dua na matavuvale. Vakamacalataka ni noda matavuvale oqo era lomani keda ka sa rawa ni da vakaraitaka na noda loloma ki na noda matavuvale ena noda lomavinaka kei na veivukei.

Vakatotomuri ni iVukivuki Taura tu na konteina ka kerea e dua na gone me digitaka e dua na lewe ni matavuvale. Tukuna vei ira na gone na lewe ni matavuvale cava o ya (tina, tama, tacina, ganena, se gone dramidrami), ka me ra cavuta vata kei iko. Vakaturutaka e dua na sala sa rawa ni ra vakaraitaka kina na nodra lomana na lewe ni matavuvale o ya (ena nodra tomika cake na iyaya ni vakatatalo, veiwa-sei, matadredredre, kei na so tale). Sureti ira me ra vakatotomuria na ivukivuki o ya. Vakayacora na itaviqaravi oqo ki na lewe yadua ni matavuvale.

Sere Lagata se cavuta na qaqa ni sere “A Happy Family” (*Children’s Songbook*, 198) ka matanataka na malanivosa oqo e ra. Sureti ira na gone me ra tomani iko.

Au lomani tinaqu; e lomani au o koya. (*tara na saremu*)
Keitou lomani tata, o io sa dina sara; (*mo degudeguvacu*)
E lomani keitou o koya, ia mo raica oqo, (*dedeka na ligamu ruarua*)
Keitou sa vuvale mamarau. (*mokoti iko ga*)

Au lomani ganequ; e lomani au o koya. (*tara na saremu*)
Keitou lomani taciqu, o io sa dina sara; (*mo degudeguvacu*)
E lomani keitou o koya, ia mo raica oqo, (*dedeka na ligamu ruarua*)
Keitou sa vuvale mamarau. (*mokoti iko ga*)

iTinitini Vakayaloqaqataki ira na gone me ra dau lomavinaka ka dauyalololoma ki na nodra lewe ni matavuvale. Sureti ira me ra cavuta, “Au lomana na noqu matavuvale.”

Masu Sureta e dua na gone me cabora na isogo masu.



IWALEWALE NI VEIVAKAVULICI

iTuvaki vakaiyaloyalo: Kevaka e sega ni tiko e dua na misini ni fotokopi, vakataqara e dua na pepa ki na veituvaki vakaiyaloyalo ka vakatotomuria ena dua na penikau se peni. Kakua ni leqataka na veituvaki ni kena laini kece; me vakatotomuri ga na ituvaki ni laini e taudaku.

Me maroroi na ituvaki oqo me vakayagataki ki na veilesoni ena tarava mai (me vakataka na lesoni 13). Sa rawa mo na vakayagataki ira talega ki na nomu raicalesu na lesoni oqo ena dua ga na gauna sa rawa ena kalasi ni isususu.

Me kilai: Ena gauna ni lesoni oqo, mo dau nanuma tiko na ituvaki ni nodra itikitiko kei na nodra matavuvale na gone yadua.

NA ITAVIQARAVI ME DIGITAKI

VAKAVAKARAU *Me baleta na italanoa:* Vakatakilakilatata toka na tabana e 18 ena ivolavakarau oqo me rawarawa na nomu cega.

Me baleta na posita: Kerea mai vei ira na itubutubu e dua na itaba lailai ni luvedra e taba vata tiko kei ira na nona matavuvale (era sa rairai vakarautaka oti beka mai na itaba oqo ena imatai ni gauna a lewena kina na kalasi ni isususu; raica na tabana e 7. Vakabira na itaba yadua oqo ki na dua na posita levu e lalaga. E delana, vola kina “Au Lomana na Noqu Matavuvale.”

iTalanoa Vakaraitaka kivei ira na gone na kedrau itaba o Jisu kei na marama tinana (tabana e 18). Dusi Jisu ka tukuna vei ira na gone ni oqo na itaba kei Jisu ena gauna se gone lailai tiko kina. Dusi Meri ka tukuna ni oqo na marama tinai Jisu. Vakamacalataka ni matavuvale nei Jisu e a matavuvale dauloloma ka a maroroi Koya vakavinaka sara ena gauna a se gone lailai kina, ka lomana dina vakalevu o Koya na Nona matavuvale. Vakaturutaka vei ira na gone na sala eso e rawa ni ra vakaraitaka kina ni ra lomani ira na tinadra (ena nodra dau matedredredre, veivuke ena sasamaki, dau mokoti ira na tinadra, kei na veika tale eso). Sureti ira me ra vakatakarakarataka ni ra sa cakava tiko na veika oqo.

Sere Vakuria eso na qaqana vou ki na sere “Fun to Do” (*Children’s Songbook*, 253) me ra vakavulici kina na gone ena so na sala me ra vakaraitaka kina na nodra lomana na nodra matavuvale. Me kena ivakaraitaki, kaya vei ira na gone, “Me da vakaraitaka mada e dua na ka ni da lomani Sisita.” Lagata “Na veiwaseitaka na iyaya ni vakatatalo e ka marautaki ni da vakayacora” ka vakatakarakarataka vakarawarawa ga. Se dua tale na vosa o rawa ni vakayagataka, “Na tomiki cake ni iyaya ni vakatatalo e ka marautaki ni da vakayacora,” “Na samaki ni rumu e ka marautaki ni da vakayacora,” “Na matedredredre e ka marautaki ni da vakayacora,” “Au dau marau niu vukei tamaqu,” kei na so tale.

Posita Vakaraitaka na posita o sa vakarautaka oti tu. Dusia e dua na iyaloalo ka kaya, “Oqo na [matavuvale] nei [yaca ni gone]. Oqo o [yaca ni gone].” Me vakayacori ki na gone yadua. Vakamatatataka ni sa tiko na noda dui matavuvale yadua era sa lomani keda dina ka da sa lomani ira. Mo vakaraitaka ena veimacawa na posita oqo ka me ra dau sauma mai na veitaro e dau tarogi me baleta na nodra matavuvale (“Evei na matavuvale nei [yaca ni gone]?” “Evei o [yaca ni gone]?” “Evei o Tata?” kei na so tale). Vakuria ki na posita na kedra iyaloalo na gone era curuvou mai ki na isususu.

IWALEWALE NI VEIVAKAVULICI

Vakavakarau: Na nomu vakavakarau ni bera ni tekivu na kalasi ni isususu ena solia vei iko e dua na gauna mo raici ira kina vakavinaka na gone ni ra yaco mai. Kidavaki ira ena matedredredre. (Raica na *Veituberi, Me iLutua ni Noda Bula*, 93.)

Tokaruataki: E dua vei ira na iwalewale mana ni veivakavulici vei ira na gone ena itabayabaki ni isususu o ya na kena dau tokaruataki na veika eso. Era dau taleitaka na gone me ra dau rogoga tale na sere kei na italanoa ena veigauna kecega. Vakayagataka na vosa vata ga a tukuni taumada kina.



Au Lomana na Noqu Matauvuale

